

## EPHESA

### *Zeelawi*

<sup>1</sup> Khawsa ngaihnaak amyihna Jesu Khrih a ceityih pynoet na ak awm, Paul ing, Ephesa khaw awhkaw thlakciim, Khrih awh ypawm na ak awm thlangkhqi venawh. <sup>2</sup> Ni Pa Khawsa ingkaw Bawipa Jesu Khrih a venna kaw qeennaak awm seh nyng.

### *Khrih-awh Myihla Zoseennaak*

<sup>3</sup> Ni Bawipa Jesu Khrih Khawsa ingkaw Pa venawh kyihcahnaak awm seh, khawk khan awh ningnih ce amah ing zoseennaak ni pek khqi nawh Khrih awh Myihla ben zoseennaak soep-kep ce ni pek khqi hawh hy. <sup>4</sup> Ak ciimcaih coet a kap kaana a haiawh awm aham khawmdek a syn hlan awhkawng ningnih ce nik tyk khqi hawh hy. Lungnaak awh <sup>5</sup> amah ing ningnih ve a cana taak aham Jesu Khrih awh a oepchoeh na ni hoep khqi hawh hy, amah a zeelnaak ingkaw ngaihnaak amyihna – <sup>6</sup> a boeimang qeennaak kyihcahnaak ingkaw, amah ing a lungnaak thlang awh ningnih ce a zoe na ni pek khqi hawh hy. <sup>7</sup> A thi ak coming thawngnaak ce ni hu uhy, thawlh qeenkhaw ngainaak, ak dung soeih soeih Khawsam qeennaak amyihna, <sup>8</sup> ningnih ak khanawh cyihnaak ingkaw zaksimnaak ce a hai kaana ni vyih sih khqi hy. <sup>9</sup> Amah a koe ak leek zeelnaak, Khrih awh ang cainaak a awm hawh amyihna, amah awhkaw ang hyp ngaihnaak ce

ningnih a venawh dang sak hawh hy, <sup>10</sup> a tym a khoek awh khan ing khawmdek awhkaw ik-oeih boeih boeih a lu na ak awm Khrih ak kaina taak peek boeih aham ak kawngaih na awm hawh hy.

<sup>11</sup> Amah awh ningnih awm tyk na ni awm uhy, amah a ngaihnaak amyihna ik-oeih boeih ak poekkung ing ang cainaak amyihna ni hoep oepchoeh khqi hawh hy. <sup>12</sup> A boeimangnaak ak kyihcahking na ni awmnaak thai aham, ningnih taw Khrih awh ngaih-unaak ak ta cyk na ni awm uhy. <sup>13</sup> Nangmih awm awitak, ni loetnaak awithang leek ce naming zaak awh, Khrih awh awm hawh lawt uhyk ti. Namik cangnaak hawh a dawngawh, nangmih a pum awh hatnaak, Ciim Myihla awikamnaak ce awm hawh hy. <sup>14</sup> Khawsa koena ak awm amah a boeimangnaak kyihcah aham ak awmkhqi a thaawngnaak a pha hlan dy ningnih a qo pangnaak hly awh anih ce hawih na awm hy.

### *Zeelawi Kqawn Ingkaw Cykahnaak*

<sup>15</sup> Vawh, nangmih ing Bawipa Jesu awh cangnaak ing thlakciimkhqi boeih nami lungnaak ce kang zaak awh, <sup>16</sup> a boet kaana zeelnaak awi kqawn nyng, kak cykahnaak awh nangmih ce ni sim khqi poepa nyng. <sup>17</sup> Ni Bawipa Jesu Khrih a Khawsa, qeennaak ing ak be Pa ing cyihnaak Myihla ing amah ce ak leek bet na nami sim thainaak aham ingkaw huh saknaak ce a ni peek thainaak khqi aham thoeh poepa nyng. <sup>18</sup> Amah ing anik khynaak ngaih-unaak, thlakciimkhqi ing boeimangnaak qo pang hly kawi ce nami sim thainaak aham nangmih ak kawlung mik a dai

sak naak aham cykcah bai nyng. <sup>19</sup> Ak cangnaak ningnih boeih aham thaawmnaak ak bau soeih ce awm hy. Cawhkaw thaawmnaak cetaw ak thaawmnaak ak bau soeih ing bibi amyihna awm hy.

*Khrih-awh Khawsa A Saithainaak*

<sup>20</sup> Khrih ce thawh tlaih nawh Khawk khan hun awh Pa tang benawh ang ngawihsaknaak thaawmnaak ce haw nahy, <sup>21</sup> uknaak ingkaw saithainaak, thaawmnaak ingkaw temnaak, peek thai na ak awm ming boeih boeih, tuh a khuk awh am nawh ak law hly a khuk ak khanawh Khrih taw awm hy. <sup>22</sup> Ik-oeih boeih boeih a khawk kaiawh Khawsa ing taak pe nawh thlangboel aham ik-oeih boeih boeih a lu na anih ce tahy. <sup>23</sup> Cawhkaw thlangboel cetaw a pumsa ni, ik-oeih soepkep awh ak be soep saknaak ce.

## 2

*Thihnaak Awkawng Hqingnaak*

<sup>1</sup> Nangmih taw, awi eeknaak ingkaw thawlhnaak awh thi hawh uhyk ti. <sup>2</sup> Ve khawmdek a phung na nami awm awh ce zilh ak ukkung boei, tuh awm awi amak ngaikhqi venawh bi ak bi myihla a phungna awm uhyk ti. <sup>3</sup> Ak kqym awh ningnih boeih awm cekkhqing lakawh khaw ni sa lawt uhy. Thawlh a ngaih sainaak ingkaw thawlh ngaihnaak a huawh ce ning bat lawt uhy. Thlak changkhqi amyihna, ningnih awm kawsonaak ak zawkkhqi na ni awm uhy. <sup>4</sup> Cehlai ningnih a ni lungnaak khqi soeih a dawngawh,

qeennaak ing ak be, Khawsa ing, <sup>5</sup> awi eeknaak aw h ni thih huiawh awm Khrih ing ningnih ce ni hqing sak khqi haih tlaih hawh hy – qeennaak aw h ni nangmih hulna ni awm uh. <sup>6</sup> Khawsa ing ningnih ve Khrih ing ni thawh sak khqi haih nawh, Khrih aw h khan hun na amah ing ning ngawih sak khqi haih hy. <sup>7</sup> Ak law hly khuk a awm aw h am qeennaak amni nyhtah thai noeng ce ang dang saknaak aham ingkaw Jesu Khrih aw h ningnih ani lungnaak khqi ce ang dang saknaak ahamni. <sup>8</sup> Caangnaak coming qeennaak aw h thaawngna namik awm ni; namimah a bibi camawh am nawh, Khawsa a them pek ni; <sup>9</sup> bibinaak ak coming amni, cemyih am kaa taw thlang ing cawng a cah qu kawm uh. <sup>10</sup> Them leek sai ahamna Isu Khrih aw h saina ni awm nawh amak a kut sai qoena nik awm ni; ce them leek sai ce ni khawsak hly qoena Khawsa ing a syn qoe ni.

### *Khrih-awh Pynoet*

<sup>11</sup> Cedawngawh, maana ningnih pumsa aw h Gentel, pumsa aw h kut ing sai “Chahhui qeet” ami tikhqi ingkaw “Chahhui amak qeet” ami tikhqi aw, <sup>12</sup> ce tloek aw hce, Khrih kana, Israelkhqi a tui khaw ingqaw lak hla ing, khawmdek aw h ve ngaih-uunaak amak ta ingkaw Khawsa kana awm ing, awikam aw hkawng khinna nami awm ce sim poe kawm uk ti. <sup>13</sup> Cehlai tuh awhtaw Jesu Khrih aw h, nangmih maana ak hla soeihna namik awmkhqi ce Khrih a thi ing zoei sak awm uhyk ti.

<sup>14</sup> Amah qoe qoe ce ningnih aham qoepnaak na awm hawh hy, anih ing pakkhih ce pynoet na sai nawh qaal anglak pheknak vawng ak awm ce hqe hawh hy, <sup>15</sup> a pumsa ing anaa ak awipeek sai aham ak awmkhqi boeih ce hqe hawh hy. Amah aw thlang pakkhih ak khuiawh kawng thlak thai pynoet sai aham cai hy, cemyihna qoepnaak ce sai hy. <sup>16</sup> Vawhkaw pum pynoet awkhawng thinglam ak coming Khawsa ingkaw cekqawi anglak law aw thunaak ce sai hy, thinglam aw a thihnaak ak coming qaal qunaak ce boet sak hy. <sup>17</sup> Nangmih ak hla nakaw ak awmkhqi ingkaw ak zoe aw ak awmkhqi venna law nawh qoepnaak awi ce kqawn hy. <sup>18</sup> Cedawngawh amah ak coming ningnih boeih ing Pa a venawh Ciim Myihla pynoet ak coming tuqunaak ce ni ta uhy.

<sup>19</sup> Cedawngawh, nangmih taw khawlawng thlang ingkaw thlang lang na am awm voel uhyk ti, Khawsa ak thlangkhqi ingkaw Khawsa ipkhui cakaw na awm hawh uhyk ti. <sup>20</sup> Ceityihkhqi ingkaw tawnghakhqi aw sak na awm u tiksaw, Khrih amah qoe qoe ce a kil awkhaw lungkhoeng na awm hy. <sup>21</sup> Anih aw im ce tuqu boeih nawh Bawipa a bawkim na dyi hy. <sup>22</sup> Nangmih awm amah aw hce Myihla-awh, Khawsa awmnaak a ham sakna namik awm ni.

### 3

#### *Gentelkhqi Venawh Paul A Bibi*

<sup>1</sup> Cedawngawh kai Paul, nangmih Gentelkhqi ak camawh Jesu Khrih aw h thawng ak tla, ing – <sup>2</sup> nangmih aham kai a venawh peek na ak awm Khawsa am qeennaak bibi ka taak ce za hawh uhyk ti; <sup>3</sup> cemyihna awihyp ce ak tawi cana ka qee law hawh amyihna kai a venawh awiphawngnaak ing ni sim sak hy. <sup>4</sup> Ce ak awi ce nami noet aw h, Khrih ak awihyp ka huhnaak akawng ce zasim thai kawm uk ti, <sup>5</sup> cawhkaw awihyp ce tuh Myihla ing Khawsa a ceityih ciimkhqi ingkaw tawng hakhqi venawh ang dang sak amyihna ak chang cadil khqi anglaklung aw h simsak na am awm hy. <sup>6</sup> Cetaw veni, Awithang leek ak coming Jesu Khrih-aw h Gentelkhqi qo a pangpyikhqi, pumsa a ke a baipyikhqi, awikam dopyikhqi na awm uhy. <sup>7</sup> Amah a saithainaak bibinaak ak coming ka venawh peek na ak awm Khawsam qeennaak aw h kai taw ve awithang leek a tamnaa na awm nyng.

<sup>8</sup> Khawsak thlangkhqi boeih ak khuiaw h ak zawi soeihkhqi anglakaw h zawi khqoet hlai nyng vawhkaw am qeennaak ve ka venawh ni pehy: Gentelkhqi venawh am sui thai noengna ak awm Khrih a boeinaak ce kqawn peek aham ingkaw, <sup>9</sup> maa aw h, ik-oeih boeih ak synkung Khawsa aw h thuh na ak awm, ve awihyp a bibinaak ve thlang boeih a venawh sim sak aham ni. <sup>10</sup> Anih angcainaak taw, thlangboel ak coming, Khawsa a cyihnaak ak dung soeih ce khawk khan hun aw hkaw ukkungkhqi ingkaw saithainaak ak takhqi venawh simsak aham ni, <sup>11</sup> amah a kumqui angcainaak ce ningnih Bawipa Jesu

Khrih aw h soep sak haw h hy. <sup>12</sup> Amah aw h cangnaak ak coming ngaihdingnaak ingkaw y pnaak taak doena Khaw sa venaw h ni zoe thai haw h uhy. <sup>13</sup> Cedawngaw h, nangmih boeimangnaak aham kai ing ka khuikhanaak aw h ve namik tha koeh set sak uh.

*Myihla Thamahnaak Ham Cykcahnaak*

<sup>14</sup> Ve ak camaw h Pa a haiaw h khuk sym ing koep nyng, <sup>15</sup> anih a venaw h kawng khaw k khan ingkaw khawmdek aw h ak aw m a cakaw khqi ing a mimah ang ming ce hu uhy. <sup>16</sup> A boeimangnaak ingkaw ang Myihlaa ak coming nangmih ak kawlung khuiaw h thaawmnaak ani peeknaak khqi thai aham cykcah lah uh, <sup>17</sup> nangmih ak kawlung khuiaw h cangnaak ak coming Khrih a aw m thainaak aham. Lungnaak aw h namik kqa thla unaw h nami caknaak aham cykcah nyng. <sup>18</sup> Thlakcimkhqi mi kutoetna a kaunaak, a saunaak, a saangnaak ingkaw a dungnaak khqi ce simcaihthainaak ingkaw, <sup>19</sup> Khrih a lungnaak am sim noeng simthainaak ce ta thai kawm uk ti. <sup>20</sup> Caw hce, ningnih aw h ak bi themsaithainaak amyihna, ni thoehnaak ingkaw nik poeknaak boeih anglakaw h ak saang soeihna them ak saithaikung venaw h, <sup>21</sup> kumqui dy, kumqui dy na, thlangboelkhqi ingkaw Khrih Jesu aw h boeimangnaak aw m poe seh nyng. Amen.

## 4

*Khrih A Pumqaw Ingkaw A Ke A Bai*

<sup>1</sup> Nangmih ing khynaak nami huh amyihna khynaak ing ang qoep na khaw nami sak aham

Bawipa awh thawng ak tla kai ing ni yyn khqi nyng. <sup>2</sup> Namik kaw dung sak unawh taw awm moel moel uh; yhnaak ta law unawh taw pynoet ingkaw pynoet kawdung doena lungnaak ing awm law uh. <sup>3</sup> Qoepnaak ing pinzen qu unawh Myihla ak kawdawnaak ce nami hamnaak thai ham tha lo lah uh. <sup>4</sup> Pum pynoet doeng awm nawh Myihla awm pynoet ni a awm – nangmih anik khy khqi awh ngaih-unaak pynoet doeng ing a nik khy khqi amyihna – <sup>5</sup> Bawipa pynoet, cangnaak pynoet, bapisma pynoet; <sup>6</sup> ik-oeih soepkep ak khan ingkaw ik-oeih soepkep awh ak awm Pa Khawsa pynoet doeng ni a awm.

<sup>7</sup> Cehlai ningnih boeih a venawh Khrih ing a hoep lawnaak amyihna am qeennaak ce peek na awm hawh hy. <sup>8</sup> Cedawngawh:

“Khan na a hang kaiawh tamnaakhqi ce sawi khqi nawh,  
thlanghqingkhqi venawh awm kutdo ce pe hy,” tinawh anak kqawn hy.

<sup>9</sup> (Amah ce khawmdek ak kaina, khawmdek awh nuk kqum hy ti am awhtaw “hang kaai hy” tive ikaw ak kqawn ngaihnaak hy voei? <sup>10</sup> A nuk kqum ce khawk khan boeih ak khanna a hak kaai ceni, khawmdek ingkaw khawngghi boeih anih ing a khuk thainaak aham cemyihna ce awm hy.) <sup>11</sup> Anih ing thlangvang ce ceityih na, thlangvang ce tawnggha na, thlangvang ce awithang leek ak kqawnkung na, thlangvang ce tuuk khai ingkaw cawngpyikung na tahy, <sup>12</sup> Khawsa ak thlangkhqi ing bibi thai unawh, Khrih a pum ce a ming dyih naak sak thai aham, <sup>13</sup> cangnaak



awh pynoet na bawngqu unawh Khawsa Capa simnaak awh kawcyihnaak taak dyna ni awm-naak aham ingkaw, Khrih awh ni beenaak thai aham cemyihna ce tahy. <sup>14</sup> Cawhtaw naasen na amni awm voel kawm uh, tuinu ing hu na hai na amni khyn voel kawmsaw, cawngpyinaak ingkaw thlang a thainaak soepkep ing hu na hai na amni zawn voel kaw. <sup>15</sup> Lungnaak ingkaw awitak ce nik kqawn kawm usaw, lu na ak awm Khrih awh ik-oeih soepkep awh ning taai hawh kawm uh. <sup>16</sup> Amah a venawh kawng pum boeih ce tuqu nawh tha pe qu uhy, lungnaak ing taai unawh, amah a bi ce bi qip uhy.

### *Dainaak Cakhqi Myihna Khawsak*

<sup>17</sup> Cedawngawh ve ve ka nik kqawn peek khqi, ve a dawngawh Bawipa awh awm unawh, kawna amak nyt Gentelkhqi ak poeknaak amyihna nami awm aham am awm voel hy. <sup>18</sup> A mingmih ang zaksimnaak taw khaw amyihna than nawh, simnaak a taak kaana kawlung ami qil sak adawngawh Khawsa hqingnaak ingqawi phek qu uhy. <sup>19</sup> Ak che ak leek simnaak a taak voel kaa qoena, pumsa ngaih amak ciimcaih soepkep benawh a mimah ingkaw a mimah ce pe qu uhy, hyy ngaihnaak benawh cet khqoet khqoet uhy.

<sup>20</sup> Cehlai, nangmih taw, cemyihna Khrih ce am sim uhyk ti. <sup>21</sup> Anih akawng ce naming zaaknaak amyihna Jesu Khrih awh ak awm awitak ce nangmih a venawh cawngpyi na awm hawh hy. <sup>22</sup> Maa nakaw nami khawsaknaak thlanghqing khym, thailatnaak ing ak bee ce khawng unawh,

<sup>23</sup> namik kawlung ce myihla awhce ak thaaina awm unawh; <sup>24</sup> thlanghqing ak thaai, awitak dyngnaak ingkaw cimcaihnaak awh Khawsamyihna saina ak awm ing ce thoeihcam qu kawm uk ti.

<sup>25</sup> Cedawngawh nangmih boeih ing amak thym ik-oeih ce suut unawh na kengsam awhkaw thlang a venawh awih thym ce namik kqawn aham awm hy, ningnih ve pum pynoet a ke a baikhqi na ni awm uhy. <sup>26</sup> Kawso unawh, thawlh mah koeh sai uh; namik kawsonaak ce khaw ing koeh tlaak pyi seh; <sup>27</sup> setan ce ang dyih hun koeh pe law uh. <sup>28</sup> Ak qu khawi ing koeh qu voel seh, bibi seitaw, ak voet ak hlauh thlangkhqi ce a do a dan thainaak aham amah a kut qoe ing amah aham a hawihkhangnaak hly bi ce sai seh.

<sup>29</sup> Nam khak khuiawh kawng awihche koeh cawn sak, cehlai a ngoengaihnaak amyihna themleek ak sai ham awileek a hoei cawn seh, ak ngai zaakhqi ham lungnaakna a awmnaak a hamna. <sup>30</sup> Khawsa a Ciim Myihla ce koeh kawseet sak uh, hulnaak nyn aham anih awhce hatnaak deng sihna namik awm ni. <sup>31</sup> Awihkhaakhqi, kawsonaakhqi, kawtawinaakhqi, qawnaakhqi, awihche kqawnnaakhqi boeih boeih ingkaw thawlhnaak boeih boeih khqi ce centaak kawm uk ti. <sup>32</sup> Pynoet ingkaw pynoet ak khanawh qeennaak ta law unawh, Khrih awh Khawsa ing nangmih qeenkhaw a ning ngai pekkhqi amyihna, nangmih pynoet ingkaw pynoet qeenkhaw ngai qu lah uh.

## 5

<sup>1</sup> A lungnaak a cakhqi na nami awm amyihna, Khawsa a khawboe ak oetkung na awm law lah uh, <sup>2</sup> Khrih ing ningnih ni lung nak khqi nawh ningnih aham Khawsa venawh bawktui bulnaak na ang peek qu amyihna, nangmih awm lungnaak ing khaw sa lah uh. <sup>3</sup> Nangmih anglakawh nu ingkaw pa thawlhnaak, kamvaanaak ingkaw amak ciimcaih ikawmyih awm a awm qoe qoe aham am awm hy, vemyihkhqi ve Khawsa thlangkhqi ing am kawih na uhy. <sup>4</sup> Chahnaak ben awihqawn khqi, qawnaak awihqawnkhqi ingkaw amak coeng poeloem halang awihqawnkhqi ve a awm voel kaana zeelawi mah qqawn kawm uk ti. <sup>5</sup> Vekkhqi ve sim kawm uk ti: khawboe amak leek, amak caih ik-oeih ingkaw ak kamvaa ak thlang cemyih ak thlang taw myihlip ak bawk ak thlang ni – cemyih ak thlang ing Khrih ingkaw Khawsa qam ce am pang thai kaw.

### *Khawkdai Inggaw Khawmthan*

<sup>6</sup> Thlang ing awihqawng ing koeh ni thai nak khqi seh, kawtih cemyihna awi amak ngai thlangkhqi ak khanawh Khawsa ak kawsonaak ce pha kaw. <sup>7</sup> Cemyih ak thlangkhqi mi koeh awm law haih uh. <sup>8</sup> Thannaak ak khuiawh ni nami awm hlai, tuh taw Bawipa awh vangnaak ak khuiawh awm hawh uhyk ti. Cedawngawh vangnaak cakhqi amyihna awm lah uh, <sup>9</sup> (Ikawtih vangnaak ak thaih taw themleek, dyngnaak ingkaw awitak awm awm nawh), <sup>10</sup> Khawsa ngaihnaak ce hu uhy. <sup>11</sup> Ak

thaih amak awm than a bibiaak awh koeh thum unawh taw, cemyih ik-oeih sainaakkhqi ce dang sak lat uh. <sup>12</sup> Awingai kaana thannaak ak khui awhkaw ik-oeih sai ve kqawn aham awm chah awm hy. <sup>13</sup> Cehlai vangnaak ing ak coei ik-oeih boeih taw huh thai na awm hy, <sup>14</sup> vangnaak ing ik-oeih boeih ce huh thai aham coei hy, cedawngawh, “Aw ak ip nang, hqyng nawhtaw, thihnaak ak khuiawh kawng tho hlah cawhtaw Khrih a vangnaak ing nik coei kaw,” tinawh anak kqawn hawh hy.

<sup>15</sup> Cedawngawh nami khawsak naak awh ce ak nep na naming ngaih ta lah uh, a cyih amak awm amyihna koeh awm unawh thlakcyi amyihna awm lah uh, <sup>16</sup> khawngghikhqi ve ama leekvoel hawh adawngawh, a tym leek boeih boeih ce thlai lah uh. <sup>17</sup> Cedawngawh thlakqaw amyihna koeh awm unawh taw, Bawipa ak kawngaih ve ikawnu tice sim law lah uh. <sup>18</sup> Zuu koeh qui uh, ce ing khawboe amak leek ce awm sak hy. Ce anglak awh Myihla ing be lah uh. <sup>19</sup> Pynoet ingkaw pynoet Saam awi kqawn unawh, kyihcahnaak laa ingkaw Myihla ben laa ce sa lah uh. Namik kawh khuiawh Bawipa venawh kyihcahnaak laa ce sa lah uh, <sup>20</sup> a soep hoeiawh Pa Khawsa venawh ni Bawipa Jesu Khrih ang ming ing zeelawi kqawn poepa lah uh. <sup>21</sup> Khrih kqihchahnaak ing pynoet ingkaw pynoet pe qu lah uh.

### *Chungvaa Khawsak*

<sup>22</sup> Zukhqi, Bawipa venawh naming peek qu amyihna nami vaakhqi venawh pe qu lah uh. <sup>23</sup> Khrih taw amah a pumna ak awm, amah ing a thaawng thlangboel a lu na a awm amyihna, vaa taw zu a lu na awm hy. <sup>24</sup> Thlangboel ing Khrih a venawh ang peek qu amyihna, zukhqi ingawm ik-oeih soepkep awh vaakhqi venawh ang peek qu aham awm hy.

<sup>25</sup> Vaakhqi, Khrih ing a thlangboel lungna nawh a hqingnaak a peek amyihna, nami zukhqi ce lung law na uh. <sup>26</sup> Khrih ing thlangboel ce ciimcaih sak hy, awi ak coming tui ing sil nawh, <sup>27</sup> amah a venawh ak vang thlangboel, myn a maa amak kap qoe, ak ciimcaih ingkaw coet amak kap na a peek amyihna nami zuukhqi ce lung law na lah uh. <sup>28</sup> Cemyih lawtna, vaakhqi ing ami zuukhqi ce a mimah a pum ami lungnaak lawt amyihna ami lungnaak aham awm hy. A zu ak lungnaak thlang taw amah a pum ak lungnaak thlang ni. <sup>29</sup> U ingawm amah a pum ce am sawh na khawi hy, Khrih ing thlangboel a hquisawi amyihna, hqin amcah nawh hqui a sawi hy – <sup>30</sup> ningnih taw amah a pum awhkaw a ke a baikhqi na nik awm ni. <sup>31</sup> Ve ak camawh pa ing a nu ingkaw a pa cehta nawh a zu ce tawm kawm saw, pakkhih ce pumoet na coeng hawh kawm nih. <sup>32</sup> Ve ve awihdung awihyp na awm hy; cehlai kai ing kak kqawn taw Khrih ingkaw thlangboel akawng ni kak kqawn hy. <sup>33</sup> Cehlai, nangmih boeih ing nami mah a pum nami lungnaak amyihna nami zukhqi ce nami lungnaak aham awm hy, zukhqi ingawm

a mi vaakhqi ce a mik kqihchah aham awm hy.

## 6

### *Cakhqi Ingkaw Nupakhqi*

<sup>1</sup> Naasenkhi, Bawipa awh nami nu ingkaw nami pakhqi ak awi ce ngai uh; vetaw ak dyng na awm hy. <sup>2</sup> “Nanu ingkaw napa kqihchah lah,” tinaak awi ve awipeek lammacyk ni. <sup>3</sup> “Naham na leek nawh khawmdek awh na hqinglu sang kaw,” tinaak awitaak ak awm ni. <sup>4</sup> Pakhqi, nami cakhqi kawsonaak hly kawi koeh sai law pe uh; ce anglakawhtaw Bawipa awh yyn a tawnaak ingkaw cuk am kiknaak ing taai law sak lah uh.

### *Tamnaa Ingkaw Boei*

<sup>5</sup> Tamnaakhqi, Khrih ak awi naming ngai peek amyihna, khawmdek awhkaw nami boeikhqi ak awi ce kawlung ciimnaak ing ngaih law pe unawh taw kqihnaak ing kqihchah lah uh. <sup>6</sup> Thlanghqing kawzeelnaak hamna mik huh doengawh bi a sai kana, Khrih a tamnaa na nami awm amyihna, namik kawlung khuiawh kawng Khawsa ak kawngaih ce sai law uh. <sup>7</sup> Thlanghqing a bi ak bi amyihna ak poek kaana, Bawipa bi ak bi amyihna, namik kawlung tang tang ing bibi law pe uh, <sup>8</sup> kawtih tamnaa awm tamnaa am awm, thlang boeih ing bibi leek ami bi amyihna, Bawipa ing kutdo ce pe kaw, tice sim uhyk ti.

<sup>9</sup> Boeikhqi, nangmih ingawm nami tamnaakhqi ce cemyihna sai law lawt uh. Cekkhi ingkaw nami Bawipa taw khawk khan na awm hy tice sim doena, tamnaakhqi ce koeh the koeh

kha na uh, kawtih Khawsa ing u a haai awm am toek hy.

*Khrihca Ingkaw Myihla Phuqhaa*

<sup>10</sup> A hukhit awh, Bawipa a saithai thaawmnaak awh namik tha awm law sak lah uh. <sup>11</sup> Setan ang cainaak ce nami khamnaak thai aham Khawsa a phuqhaa ing thoeihcam qu lah uh. <sup>12</sup> Ikawtih ningnih taw pumsa thisa qaal mi amning tuk qu unawh, ukkungkhqi, saithainaak ak takhqi, ve khawmdek than thaawmnaakkhqi ingkaw khan nakaw Setan myihla thaawmnaakkhqi mi ni ning tuk qu uh. <sup>13</sup> Cedawngawh Khawsa ang thoeihcamnaak Phuqhaa ing thoeihcam qu lah uh, cawh ni khawngghi amak nep a pha law awh, ak cakna dyi thai kawm u tiksaw, ik-oeih boeih nami sai coeng dyna naming dyih hly thai hy. <sup>14</sup> Cedawngawh awitak cawi zeennaak ing zeen qu unawh, dyngnaak kqangdan ing dah qu doena, <sup>15</sup> qoepnaak awithang leek khawmyk ce myk doena a oepchoeh na awm lah uh. <sup>16</sup> Vemyihkhqi boeih boeih coengawh, cangnaak puhqa ce pawm lah uh, ve ing ni setan a la ak alh hlap hlap ce namim thih hly thai hy. <sup>17</sup> Hulnaak thi lumyk ce myk unawh, Khawsa a zawzi Myihlak zawzi ce pawm lah uh. <sup>18</sup> A soep hoeiawh cykcahnaak thoehnaak soepkep ing Myihla awh cykcah lah uh. Ve ve nak kawkhuiawh taak doena, thlakciimkhqi boeih aham cykcah poe lah uh.

<sup>19</sup> Ityk awhawm kam kha ka awng hoeiawh awithang leek awihyp ve ak kqih kaana kak

kqawnnaak thai aham, kai aham awm cykcah law lah uh, <sup>20</sup> ve a dawngawh dyihthing na awm nyng saw thiqui ing khihna awm nyng. Kqihnaak a taak kaana kak kqawnnaak thai aham, cykcah law uh.

### *Hukhit Awiynnaak*

<sup>21</sup> Ka lungnaak ka naa, Bawipa a ypawm tyihzawih, Tukika ing ik-oeih soepkep ce nik kqawn law pek khqi bit kaw, cawhkaw iamyihna ka awm nawh ikaw ka sai tice sim kawm uk ti. <sup>22</sup> Ikawmyihna ka mi awm tice sim unawh anih ing tha ani peeknaakkhqi thai aham anih ce tyi law kawng. <sup>23</sup> Pa Khawsa ingkaw Bawipa Jesu Khrih a ven awhkaw lungnaak ingkaw cangnaak ce koeinaakhqi venawh awm seh nyng. <sup>24</sup> Amak thi thai lungnaak ing ni Bawipa Jesu Khrih ak lungnaak khqi ak khanawh am qeennaak awm seh nyng.



**Tuivang Holy Bible**  
**The Holy Bible in the Tuivang dialect of the Matu**  
**Chin language of Myanmar (Burma)**

Copyright © 2020 Batupei Christian Fellowship

Language: Tuivang (Chin, Matu)

Dialect: Tuivang

Copyright applies only in Myanmar. Outside Myanmar, this work is in the Public Domain.

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2020-12-23

---

PDF generated using Haiola and XeLaTeX on 11 Nov 2022 from source files dated 30 Nov 2021

02ecb546-dab3-59d0-ad6b-9ceb54cb8e08